

# Air di dua empangan kritikal meningkat

**Kuala Lumpur:** Dua empangan yang sebelum ini dikategorikan berada pada paras kritikal iaitu di bawah 40 peratus didapati mengalami peningkatan sehingga empat peratus.

Dua empangan itu adalah Padang Saga, Kedah dan Bukit Merah, Perak dengan kenaikan stok air masing-masing sebanyak 1.11 dan 4.42 peratus.

Sebelum ini, empangan Padang Saga memiliki takungan sebanyak 38.52 peratus dan meningkat kepada 39.63 peratus semalam, manakala empangan Bukit Merah meningkat kepada 14.63 peratus daripada 9.73 peratus kelmarin.

Namun, empangan yang dihentikan operasinya sejak 16 April lalu iaitu empangan Bukit Kwong, Kelantan tidak mengalami pertambahan atau penurunan dan masih berada pada tahap kritikal dengan baki simpanan air berjumlah 7.81 peratus.

Sementara itu Menteri Sains, Teknologi dan Inovasi Datuk Seri Madius

Tangau dalam kenyataan media berkata, Operasi Pembentukan Awan (OPA) yang berpangkalan di Lapangan Terbang Subang kelmarin dengan mensasarkan utara Semenanjung berjaya menghasilkan hujan.

Beliau berkata, OPA berjaya menghasilkan hujan di kawasan empangan Timah Tasoh, Perlis; empangan Ahning, Muda dan Pedu di Kedah serta empangan Air Kuning dan kawasan Bukit Larut di Perak.

Sementara itu, laman Jabatan Meteorologi Malaysia (JMM) sehingga kelmarin merekodkan tiga kawasan di Kelantan iaitu Kota Bharu, Machang dan Pasir Mas mencatat jumlah hari tanpa hujan paling lama.

Kota Bharu dan Machang tidak menerima hujan selama 23 hari, manakala Pasir Mas pula selama 10 hari.

Selain Kelantan, tiga lagi negeri tidak menerima hujan iaitu di Besut, Terengganu dan Mersing, Johor masing-masing selama 10 hari serta lima hari di Kudat, Sabah.